

Centralni birački spisak ne može se mijenjati



OHR, OSCE i Vijeće Evrope danas su dali punu podršku radu Centralne izborne komisije BiH, pohvalivši posebno izjavu koju je dala Centralna izborna komisija kojom se pojašnjava status centralnoga biračkog spiska i podržava pravo svih registriranih birača da 7. oktobra daju svoj glas.

OHR, OSCE i Vijeće Evrope sastali su se u petak sa predstavnicima Centralne izborne komisije BiH i to nakon izvještaja koji se tiču statusa novoregistriranih stanovnika i mogućih implikacija za glasače, jer su prouzročili zabrinutost i konfuziju.

Izjava CIK-a jasno potvrđuje da svako čije se ime nalazi na centralnom biračkom spisku na dan 24. augusta ove godine za općinu Srebrenica, odnosno za bilo koju drugu općinu, ima pravo da glasa u toj općini.

Centralna izborna komisija BiH također se jasno odredila i prema pitanju novoregistriranih stanovnika kazavši da svako ko želi prijaviti prebivalište nakon 24. augusta ove godine ima puno pravo da to i učini. Međutim, time ne stiže pravo da glasa u toj novoj općini u kojoj prijavljuje prebivalište na predstojećim izborima 7. oktobra.

Pravila koja su utvrđena Izbornim zakonom BiH su jasna. Centralna izborna komisija će provoditi ta pravila i izbori u Srebrenici i drugim mjestima širom Bosne i Hercegovine bit će

provođeni striktno i transparentno u skladu sa tim pravilima.